

欽
定
全
唐
文

欽定全唐文卷八百四十二

封舜卿

舜卿字贊聖渤海蓊縣人仕梁爲禮部侍郎知貢舉開平三年奉使幽州入爲翰林學士

進越王錢鏐爲吳王竹冊文

維天祐三年歲次丙寅九月辛亥朔十五日乙丑皇帝若曰惟后法天以降命式協無私惟臣體國以垂功迺興厥后周裂宗盟之士漢封子弟之邦非劉或論於諸儒同姓亦譏於太史疇庸懋賞是曰能君顧茲渺躬實屬艱運允

賴元勲廓清寰宇勤勞夙著憫予怠荒開創箕裘保我不
嗣舉同心協力者無虛日推祕畧宏謀者無間時俾列疏
封以昭馭貴況江山右地吳越名區百雉則前朝舊都會
稽乃夏后遺趾宜旌社土以統藩維咨爾定亂安國功臣
鎮海鎮東等軍節度使浙江東西等道觀察處置營田招
討淮南四面行營安撫兩浙鹽鐵制置發運等使開府儀
同三司檢校太師守侍中兼中書令持節都督杭越等州
諸軍事守杭越等州刺史上柱國越王食邑一萬戶食實
封六千戶錢鏐大昂流精維嵩孕祉萃東南秀異之氣鍾

文武英畧之姿褒然不羣卓爾斯在自總戎三紀作冀兩
藩崇名輝於廟堂茂績冊於盟府處受脤執膳之寄服貂
璫犀首之榮行既超人勲無任己勝殘務理經遠詢謀不
恃貴以專刑不務功而驕志深厚廓公侯之度剛明執忠
孝之規威加敵國而愈謙化被隣封而垂訓以一當千之
銳卒勇且知方育幼養老之編氓恭而好禮負戡亂濟時
之術蘊天資神授之機設燎延賢築壇禮士詩盈篋笈傳
癖橫經比飯均羹席上盡雕龍之客投醪散庫營中皆搏
虎之人勁節貫於雪霜至誠格於天地頃者浙人蟻市稱

霸蚊雷振妖爾則統仗順之師整爭先之旅颺馳勇敢冰
泮渠魁書於鼎彝煥若縑素近則淮夷作孽僉僧無君拒
抗王師邀截貢賦竊據州邑斷絕梯航先皇上賓之時不
展號弓之慕羣后咸秩之禮莫申執幣之儀神人共憤其
侵陵華夏爭誅其干犯爾則率義兵以疾討統王師而急
征期粉巨盜之骨必堪元克之顛是用金璽昭德彤弓報
功明國法之是彰示王澤之非濫委麟符而出征戴驚冠
而登祭慎爾修之克有終也今遣使臣中散大夫右散騎
常侍上柱國賜金紫魚袋王矩副使朝議郎守尚書司勳

郎中上柱國賜緋魚袋裴筠持節冊爾爲吳王於戲加王
爵之極號授封建之殊名天鑑孔昭則俾予永契魚水盟
踐如日則俾爾益繁子孫往盡乃心服我徵命

李翥

翥梁貞明初爲鎮州節度使王鎔判官

對舉似已者判

丙充使舉似已者御史糾按丙稱但成三物唯
善能之

父教子忠爲臣不易知人則哲惟帝稱難任官惟良底祿

以德莫不進方正之士獻賢能之書詩詠繡裳禮設庭燎
衣冠濟濟鳴玉珮而來朝文雅鏘鏘望金門而待詔祁大
夫之請老內選其親范文子之讓能豈遺其舊皆舉不失
職義不在私晉國建其一官魯史成其一作三物士遇知
已惟其似之覩星使之來儀長歌棫樸覽霜臺之糾謬反
示疑狐裘寧假有辭自然無咎

對毀濯龍泉判

與人毀濯龍泉或失其利楊氏因形勝興廢業
邑人訴勞役不伏事

秦起曲江之沼漢興濯龍之泉或因山壅流或平地出水
皆導達溝瀆修利隄防竭役費財窮侈極麗今國家罷苑
囿燕游之所爲農桑禾黍之場浸彼稻粱實我箱庾事失
業廢其何可知楊氏用因其資大興其利非直務盡地利
蓋亦誘人歸本我疆我理旣叶農夫之慶載勞載役徒使
邑人有言

許鼎

鼎梁貞明六年進士

唐通和先生祖君墓誌銘

先生諱貫字子元范陽人曾祖濟蜀州司馬祖計掌膳郎父斌守植不仕先生性寬平家人州里莫得見其喜怒長短頗覽書傳尤工詩句天才器識少有倫侶益修黃老之術初賀監知章得攝生之妙近數百年不死負笈賣藥如韓康伯近於台州上升徧於人聽元和己亥年先生遇之謂先生曰子寬中而柔外可語以至道也僊家品秩如青紫基級不可驟寘必以退節爲首退節則寡欲寡欲則神逸神逸則無爲無不爲也反此而求道猶卻走以追奔也子其志之後遇今歲遇爾於小有也乃授斷穀丹經先生

盟而受之吞一粟則十年不饑門人得之皆符經訣於是
先生道譽喧動公卿耳目求見就謁凡累十人丁酉年鄂
侯楊公爲華牧張公乞丹於先生先生曰學道先乎養神
然後吞藥藥吏也神君也君逸於上吏勞於下以勞助逸
是謂萬畢貫將吞丹也坐忘所思行忘所之卻視其身蕭
寥希夷所以絕穀十年不饑今張公萬乘柱石百姓父母
一物失所必軫於懷欲無勞神其可得乎雖九轉還丹亦
無補也公曰其言至矣己亥年秋九月先生召門人壻姪
曰二儀者萬有之逆旅而曜者百靈之燈燭欲燈燭之不

曉安逆旅之不去怪矣況賀公之期至矣乃就沐浴如有
所候粵八日奄然委化壽九十有五先生夫人胡氏蚤死
無嗣一女適張審言無男一女適黃虞卿雖別族姓皆得
鳳毛伏覽經法養志邱園聲華籍甚則曰先生無愧矣始
刻石子壻與表姪孫謝隲門弟子閔仲孚等議曰昔婁婁
諡其夫曰康至今韙之二三子得不以黔婁爲式乎我先
生聽於無聲視於無形不曰通乎言不訟物之短心不繫
時之非不曰和平謹號通和先生以彰先生之德也何如
僉曰俞遂刻號於石其年冬十一月十一日葬於宅東北

隅祔胡夫人墳右世禮也鼎亦先生所教者奉門人壻姪
命爲墳表銘曰

北西山南東湖水爲陵山爲沔先生名字終不誣

劉騭

騭梁貞明中官衡州長史進所撰地理手鏡十卷

善歌如貫珠賦

以聲氣圓直有
如貫珠爲韻

妙爲曲者暢於情樂爲心者和於聲微至儀之難象因貫
珠而強名豈不以符雅正契虛盈聆纂纂之音無遺曲折
體纍纍之狀取象圓明方其咀宮商激志氣雖直已而成

善亦導和而爲貴當發德詠功之際侔照乘之聯輝在一
唱三歎之時若呈祥而聚緯其聲旣全其質彌元發皓齒
而潛融熠熠隨雅調而暗轉連連間赤水兮虛瑩異滄海
兮孤圓動白雪之聲初疑剖蚌度元雲之曲終類投泉是
知善臻其極喜可以飾不煩不體乃端乃直赴於節意的
爍以交光盛於文想瑩煌而化

一作此

色懿夫歌以心而虛

受珠以元而可久表於直而不表於邪貫於心而不貫於
手其奏也乃生於自然其闋也復歸於無有掩抑虛徐溫
如皦如誠激揚而導志諒璀璨而澄虛所以表和平所以

類輝煥陽春爲罔象之得綠水乃驪龍之翫知音者誠審其無象無形而不知音者徒謂其有條有貫且道以物而相符事有類而形殊擇其善者騰光於瞬息去不善者匿曜於斯須吾將激流徵習繇駒精於曲喻於珠庶賞善而不昧比至寶以無渝

王延

延字世美鄭州長豐人梁相李琪薦爲卽墨令馮道作相召拜左補闕累遷刑部尚書以太子少保致仕卒年七十

三

請方鎮不判縣務奏

一縣之內所管鄉村而有割屬鎮務者轉爲煩擾益困生民請直屬縣司鎮唯司賊盜

劉鄩

鄩密州安邱縣人中和中事青州節度使王敬武爲小校光化初以破張蟾功表爲登州刺史移刺淄州天復三年從王師範降梁表爲鄆州畱後天祐二年授右金吾衛大將軍梁開平元年充諸軍馬步都指揮使檢校司徒累遷佑國同州軍兩使畱後尋爲永平軍節度使四年加檢校

太保同平章事未帝卽位授開封尹貞明元年加檢校太尉授滑州節度使領鎮南軍節度使五年遷泰寧軍節度使六年授河東道招討使命討朱友謙尹皓段凝輩素忌鄆言鄆逗遛養寇詔歸洛河南尹張宗奭承密旨逼令飲酖而卒年六十四贈中書令

陳軍中事宜疏

臣受國深恩忝茲閫政敢不枕戈假寐罄節輸忠昨者比欲西取太原斷其歸路然後東收鎮冀解彼連維止於旬時再清河朔豈期天方稔亂國難未平纔出師徒積旬霖

潦資糧殫竭軍士札瘥切慮蒼黃乖於統攝乃詢部伍皆
欲旋歸凡次舍經行每張犄角又欲絕其餉道且據臨清
纔及宋城周陽五奄至騎軍馳突變化如神臣遂領大軍
保於莘縣深溝高壘享士訓兵日夜戒嚴伺其進取偵視
營壘兵數極多樓煩之人皆能騎射最爲勍敵未可輕謀
臣若苟得機宜焉敢坐滋患難臣心體國天鑒具明

周翰

翰梁時人

顏無繇贊

顯允君子德克慶延叔世家魯陋巷生淵同師將聖俱謂
能賢千載之下清風凜然

敬翔

翔字子振同州馮翊人乾符中舉進士不第梁祖以爲館
驛巡官開平中授崇政院使遷兵部尚書金鑾殿大學士
友珪篡立拜中書侍郎同中書門下平章事唐莊宗入汴
自經死

上軍事疏

國家連年遣將出征封疆日削不獨兵驕將怯亦制置未

得其術陛下處深宮之中與之計事者皆左右近習豈能
量敵之勝負哉先皇帝時河朔半在親御虎臣驍將猶不
得志於敵人今寇馬已至鄆州陛下不畱聖念臣所未諭
一也臣聞李亞子自墨縑統眾於今二年每攻城臨陣無
不親當矢石昨聞攻揚劉率先負薪渡水一鼓登城陛下
儒雅守文未嘗如此俾賀瓌輩與之較力而望攘逐寇戎
臣所未諭二也陛下所宜詢於黷老別運沉謀不然則憂
未艾也臣雖驚怯受國恩深陛下必苦乏材乞於邊陲效
試

劉守光

守光深州樂壽人幽州節度劉仁恭之子拘父自立僭號大燕爲後唐莊宗所誅

上梁祖狀

臣守光謬叨戎寄向受國恩既有血誠合宜披訴伏自陛下初登寶位纔建皇基四方尚擾於干戈諸道未賓於聲教唯臣不勞兵刃不俟詔書便貢表章率先歸款致令河北一面晏然無虞其後又以河東結構邠岐朋附淮蜀久稽天討屢軫宸襟臣又密設機謀指揮夏侯敬受已下令

翻賊寨遣向朝廷鑾輿纔至於陝郊兵騎悉歸於行在使
克渠北遁致翠輦東歸獲立微勞稍寬聖慮其於向國粗
竭丹誠昨者兄守文遽於明時擅興兵革堅貯吞并之志
全無友愛之情誑惑宸聰卽言迎侍勾牽戎虜元逞他圖
兄之行藏臣實所諳悉當於此際備見狡謀必知要當道
之土疆爲朝廷之患害累曾申奏莫不丁寧今者旣破賊
軍足以細驗前事昨於陣上所殺契丹兵馬絕多及寨內
收得契丹與往來文字不少今又捉得自來與臣兄謀事
人道士褚元嗣學院使鄭緒等皆言兄本計謀極大妄動

絕深不唯窺取其一方實亦將圖於大事苟非臣親當戰陣手執干戈大掃羣兇生擒戎首則滄州得志蕃衆轉狂合勢連衡爲患非細固不是臣自矜小捷妄有飾詞其緒方嗣等分析文狀謹同封進其緒元嗣文狀多述守文結構說誘幽州將士及會契丹窺算幽州城池皆是自相魚肉又言如守文得志必謀亂中原以迎侍爲名實欲并吞燕薊又滄州鼓角門東有誓衆碑一所其辭願破梁國卻興唐朝及見幽州歸向朝廷遂拆卸碑樓其碑坑於樓下文字見在又守文所遣男延祚入質不是親兒又守文令

褚元嗣將琉璃水晶金銀等器錦綵與契丹將領約取幽州後別圖富貴其契丹少君遂差使還書願與守文勅令守文乃言得契丹下大夫所贊也

李襲吉

襲吉洛陽人自言左相林甫之後乾符末舉進士遇亂避地河中依節度使李都爲權鹽判官後去之太原李克用署爲府掾出爲榆次令光啓初署爲掌書記三年遷節度副使拜右諫議大夫天祐三年卒後唐同光二年追贈禮部尚書

爲周晉王貽梁祖書

一別清德十有餘年失意杯盤爭鋒劍戟山長水闊難追
二國之歡鴈逝魚沉久絕八行之賜比者僕與公實聯宗
姓原忝恩知投分深情將期棲託論交馬上薦美朝端傾
嚮仁賢未省疎闕豈謂運由奇特謗起奸邪毒手尊拳交
相於暮夜金戈鐵馬蹂踐於明時狂藥致其失歡陳事止
於堪笑今則皆登貴位盡及中年遽公亦要知非君子何
勞用壯今公貴先列辟名過古人合縱連衡本務家邦之
計拓地守境要存子孫之基文王貴奔奏之交仲尼譚損

益之友僕顧慙虛薄舊忝眷私一言許心萬死不悔壯懷
忠力猶勝他人盟於三光願赴湯火公又何必終年立敵
懇意相窺徇一時之威靈取四郊之倦弊今日得其小衆
明日下其危牆弊師無遺鏃之憂鄰壤抱剝牀之痛又慮
悠悠之黨妄瀆聽聞見僕韜勇枕威戰兵守境不量本末
誤致窺覲且僕自壯歲已前業經陷敵以殺戮爲東作號
兼并爲永謀及其首陟師壇躬被公衮天子命我爲羣后
明公許我以下交所以斂迹愛人蓄兵務德收燕薊則還
其故將入蒲坂而不負前言況五載休兵三邊校士鐵騎

犀甲雲屯谷量馬邑兒童皆爲銳將驚峰宮闕咸作京坻
問年猶少於仁明語地幸依於險阻有何覘覩便誤英聰
況僕臨戎握兵粗有操斷屈伸進退久貯心期勝則撫三
晉之民敗則徵五部之衆長驅席卷反首提戈但慮隳突
中原爲公後患四海羣謗盡歸仁明終不能見僕一夫得
僕一馬銳師倘失則難整齊請防後艱願存前好矧復陰
山部落是僕懿親回紇師徒累從外舍文靖求始畢之衆
元海徵五部之師寬言虛詞猶或得志今僕散積財而募
勇輩輦寶貨以誘義戎徵其密親啗以美利控弦跨馬寧

有數乎但緣荷位天朝惻心疲瘵戕戕亭障未忍起戎亦
望公深識鄙懷洞迴英鑒論交釋憾慮禍革心不聽浮譚
以傷霸業夫易惟忌滿道貴持盈儻恃勇以喪師如擎盤
而失水爲蛇刻鶴幸賜徊翔僕少負褊心天與真氣間謀
詭論誓不爲之惟將藥石之譚願託金蘭之分倘愚衷未
豁彼抱猶迷假令罄三朝之威窮九流之辯遺迴肝膈如
俟河清今者執簡吐誠願垂保鑒僕自眷私睽阻翰墨往
來或有鄙詞稍侵英聽亦承嘉論每賜罵言敘歡旣罷於
尋戈焚謗幸錫其載筆窮因尚口樂貴和心願祛沈悶之

嫌以復壘箠之好今者卜於曩分不欲因人專遣使乎直
詣鈴閣古者兵交兩地使在其間致命受辭幸存前志昔
賢貴於投分義士難於屈讐若非仰戀恩私安可輕露肝
膈悽悽丹懷炳炳血情臨紙嚮風千萬難述

答李克用咨問

伏以變法不若養人改作何如舊貫韓建蓄財無數首事
朱溫王珂變法如麻一朝降賊中山城非不峻蔡上兵非
不多前事甚明可以爲戒且霸國無貧主強將無弱兵伏
願大王崇德愛人去奢省役設險固境訓兵務農定亂者

選武臣制理者選文吏錢穀有司刑法有律誅賞由我則
下無威福之弊近密多正則人無譖謗之憂順天時而絕
欺詐敬鬼神而禁淫祀則不求富而自富不求安而自安
外破元凶內康疲俗名高五霸道冠八元至於率閭閻定
間架增麴蘖檢田疇開國建邦恐未爲切

王緘

緘幽州劉仁恭故吏使鳳翔還李克用畱署爲推官歷掌
書記從莊宗經畧山東承制授檢校司空魏博節度副使
胡柳之役歿於亂兵

封白雞山記

夫以玉燭搖光碧落霄懸於合彩金輿厚載丹邱靈毓於
祥音斯蓋運契星躔道符天意流淳化於萬類動植咸熙
抽勝策於九章華夷景服王澤流於上龢風悅於下故有
雲連峭壁藹如畫之煙嵐質異山梁蕭凝霜之毛羽是知
鳳鳴汧右千年而山得佳名鶴降遼東萬古而地稱佳號
我嗣晉王珠履表異玉節傳榮廓氛侵於中原濟生靈於
壽域沈研麟史征南徒釋於三編擒縱龍韜忠武虛譚於
八陣劍橫大樹戟中小枝睦鄰而將罷東征富俗而民歌

棲畝矧乎三清分派九合昇壇刑白馬以會同盟致丹鼠
而忘巨猾昔歲金橋之戰勢掩昆陽近年沮水之征威符
淝上豈謂重燃興燎惡蔓猶滋猗跳將害於周禾烏合連
羣於伏莽於是躬提千乘途邁六辰行方結於魚麗路復
經於龍野睨蒼翠之側於鬱蒼之中覩靈雉而低翔當神
騏之逸足可謂練舒皓色玉潔爭光有同於天上飛來無
異於目前化出花冠踴竦瑩瑩而珠點雙眸霜翮秦翹閃
閃而雪翻兩翅嗣王祝之曰旣瑞世瑞時可勿驚勿畏乃
虛之以雕籠擁之以襟袂忘十步一啄之心有帝扇后榆

之意若棲於瓊花枝上皎潔爭分或飲於水晶壺邊精瑩
莫認天命此豎也稅蠲青畝山封白雞前古之越裳入貢
効祉殷朝而今以晉王薦祥永光唐史緘學慙重席世奉
初誕背文總愧於色絲辭鄙應還於夢錦山唯紀事用垂
繇長佐命忠勲序列銜秩時天祐十載龍集癸酉鴻鴈來
賓之月十五日記

賀德倫

德倫河西部落人少爲滑州牙將梁祖領四鎮德倫以本
軍從累歷刺史畱後遷平盧節度使魏博楊師厚卒代其

任貞明元年三月魏軍亂執德倫囚之李克用入魏以符印上克用授雲州節度使爲監軍張承業所殺

請兼招討使奏

臣當道兵甲素精貔貅極銳下視并汾之敵平吞鎮定之人特乞委臣招討之權試臣湯火之節苟無顯效任賜明誅

欽定全唐文卷八百四十三目錄

李茂貞

請再降東川節度使顧彥暉制命表

請加贈鄭畋表

與杜讓能書

司空頴

爲張彥請復相衛狀

李德休

請詳定本朝法書奏

張文寶

請旋蹕疏

王鎔

薦王師範表

薦幽州權兵馬畱後李全忠表

復魏博節度使樂彥稹書

楊洽

鐵火筋賦

孔邈

請許注擬天成元年已有出身人奏

請錄死事子孫疏

薛昭文

陳十事疏

張繼業

劾張繼孫非親弟疏

張寶

加錢鏐爵勅

欽定全唐文卷八百四十三

李茂貞

茂貞本姓宋名文通深州博野人唐乾符中黃巢犯闕以
功爲神策軍指揮使朱玫之亂以功遷檢校太保同平章
事賜姓名僖宗親爲製字曰正臣光啓二年討平李昌符
還爲鳳翔節度使加檢校太尉兼侍中隴西郡王大順二
年討平楊復恭遂恃勲恣橫乾寧二年稱兵入覲會李克
用請討三鎮茂貞懼歸命待罪授東川節度使光化中加
尚書令封岐王天復元年矯詔討梁祖梁祖引四鎮之兵

屯岐下圍守三年乃求和及梁祖建號與王建志圖興復
竟無成功後唐莊宗平梁上表稱臣詔仍舊官進封秦王
同光二年卒年六十九諡忠敬

請再降東川節度使顧彥暉制命表

臣聞鏤鼎書旂必歸於勲德分茅建秩允屬於賢良明朝
無濫賞之文聖代絕且侯之論其有功標峴首業著燕然
殊恩尋降於虎符睿渥已頒於龍節旋遇蛇蟠劍棧棘植
銅梁遮日月之迴光阻山河而倒浪今則初開九折漸涸
長鯨宜宣旣往之恩合舉已行之命臣熟稽通論方敢上

聞儻無棄於瞽言庶有裨於元鑒臣伏見東川節度使顧
彥暉門傳將畧代襲軍功佩董卓之雙鞬撚繇基之一鏃
南金鍊質經大冶而彌堅東箭推心遇繁霜而轉勁伏自
頃歲蚊雷聚響蟾斧稱威風搖而海嶽將傾火烘而薰蘭
不辨顧彥暉與亡兄彥朗提戈鴈塞奮臂龍沙同驅羆豹
之師入奉紀綱之僕青黃杵下辛勤果建於勲庸赤白囊
中動靜罔違於禁制伏以先皇帝鑾輿反正鳳輦初安爰
置酒以論功遂圖儀而表德顧彥暉亡兄彥朗繇是榮頒
劍履顯誓山河飾金之象猶新垂露之文未滅豈謂夏時

積疹奉國勞神三秋而大樹忽彫半夜而將星潛殞是致人皆罷市里爲輟春淚碑雖沒於蒿萊畫象但喧於簫鼓顧彥暉以三軍擁路百姓排關感羊祜之遺心請馮君之繼踵伏自暫持紀律權總貔貅謝元用才雖履屐而有任句踐撫士從觴豆而皆均伏蒙皇帝陛下俯念羣情仍憐異政降旌幢而示寵宣雨露以酬功風行而天下皆聞日照而人間竝見不謂絳州刺史楊守寬鴟張要路蟻聚通津擅抑芝泥強畱瑞節召兵戈於武定阻琛賁於褒梁大肆虔劉將營統制臣與邠州節度使王行瑜同興義旅共

伐奸謀一揮而梟鵬離巢再戰而猿猱失木旣通劍路尋
達刀州顧彥暉屢捧詔書曾頒旌鉞非是翦桐之戲已承
裂地之封濡涵而難滯舊恩錫賚而願加新節猶希進秩
用表優賢臣謬竊臨戎嘗思舉善敢覲先茅之賞庶遵連
茹之文

請加贈鄭畋表

臣聞有勲不廢前代格言無美不稱先王令典是垂休於
國牒將衍示於孫謀其有漢閣元勲岐山茂政霜露已彫
於大樹蓬蒿將沒於豐碑歎泉扃而緼禮未加顧藩翰而

清風盡在是敢敷陳往事啓迪前功庶雅頌而重興冀徽
猷而復舉臣伏見故鳳翔尹同中書門下平章事鄭畋瑞
應星精祥開日角建洪鑑於聖代成庶類於明時鳳毛方
浴於春池龍節忽移於右輔旋以羣鴟聚噪萬蜎鋒攢蒼
黃而玉輦省方次第而金門撤鑰九州相望初猶豫以從
風百辟無歸半狐疑而委質而畋我冠豎髮襃袖運籌羅
劍戟於樽前列貔貅於麾下乃言曰封豕肆克長鯨噴毒
冥生靈於塗燼委神器於腥羶我國家時運雖艱天厯方
遠豈可以大朝簪紱當屈節於豺狼近甸藩籬欲輸誠於

虺蜥繇是埋牲誓衆釁鼓出師飛羽檄於四方會諸侯於
萬里擎迴地軸決驚波而盡入東溟抽轉天關驅列宿而
咸尊北帝雷喧鼙鼓山矗旌旗五兵纔入犬牙一陣盡塗
龍尾值大憝建瓴之勢在元臣反掌之間不意天柱朝摧
將星夜殞竹帛徒懸於皎日衣冠已隔於佳城臣始舉義
師爰從指顧稟三令五申之訓職囊沙滅竈之謀今則謬
以微功叨居重鎮仰高蹤而如在念遺烈而未書伏乞皇
帝陛下顯舉舊勲榮加盛禮俯盡褒酬之典遐追鎔範之
功俾四海有聞致九泉無恨

與杜讓能書

宰相之職外撫四夷內安百姓陰陽不順猶資變理之功
宇宙將傾須假扶持之力卽萬靈舒慘四海安危盡繫朝
綱咸由廟算旣爲重任方屬元臣況今國步猶艱皇居未
壯曩日九衢三市草擁荒墟當時萬戶千門霜凝白骨大
廈傾欹而未已沉疴綿息以無餘皆云非賢后無以拯社
稷之危非真宰無以革寰區之弊令明公捨築入夢投竿
爲師踐履中台制臨外閭不究興亡之理罕聞沉斷之機
蓋意有所不平心有所未悟輒思上問願審臧謀竊見楊

守亮擅舉干戈阻艱西道將圖割據吞併東川居巴賓爲
一窟豺狼在梁漢致十年荆棘果聞敗衄尋挫凶狂旣前
去而不諧思卻歸而無地當道與邠州見爲隔絕綱運方
舉問罪兵師忽聞朝廷授武定之雙旌割果閬之兩郡未
審是何名目酬何功勞紊大國之紀綱蠹天子之州縣非
惟取笑於童稚抑亦包羞於馬牛自謂奇謀信爲獨見伏
慮是明公賞凶黨無君之輩挫忠臣奉國之心要助姦邪
須摧正直又聞公切於保位利在安家商量不自於中書
剽割全通於內地雖知深奧罕測津涯亦聞駭異羣情頗

是喧騰衆口

司空頌

頌貝州青陽人僖宗時舉進士不第去爲羅紹威掌書記
後入梁爲太府少卿尋解官往依天雄軍節度使賀德倫
張彥之亂彥脅德倫降于唐遣頌草奏奉狀太原莊宗署
爲天雄判官權軍府事以忤郭崇韜見殺

爲張彥請復相衛狀

臣累拜封章上聞天聽在軍衆無非共切何朝廷皆以爲
閒半月三軍切切而戈矛未息一城生聚皇皇而控告無

門惟希俯鑒丹衷苟從衆欲須垂聖允斷在不疑如或四
向取謀但慮六州俱失言非意外事在目前

李德休

德休字表逸趙郡贊皇人舉進士歷鹽鐵官渭南尉右補
闕侍御史天祐初河朔定州節度使王處直辟爲從事後
唐莊宗卽位徵爲御史中丞轉兵部吏部侍郎權知左丞
以禮部尚書致仕卒年七十四贈太子少保

請詳定本朝法書奏

當司刑部大理寺本朝法書自朱溫僭逆刪改事條或重

貨財輕人生命或自徇枉過濫加刑罰今見在三司收貯
刑書并是偽廷刪改者兼偽廷先下諸道追取本朝法書
焚毀或經兵火所遺皆無舊本節目只定州勅庫有本朝
法書具在請勅定州節度使速寫副本進納庶刑法並合
本朝式令

張文寶

文寶昭宗朝諫議大夫顓子初依河中朱友謙爲從事後
唐莊宗卽位擢知制誥歷中書舍人刑部侍郎左散騎常
侍知貢舉遷吏部侍郎

請旋蹕疏

巡狩省方唐虞之舊典弔民伐罪湯武之前功陛下親統
貔貅盡除梟獍刷盪瑕穢殄息氛埃天威已震於華夷濡
澤又沾於幽顯動植蘇泰遐邇歡康所宜旋軫神都凝旒
紫禁居中土而表正來萬國以均輸允叶億兆之心共樂
雍熙之化

王鎔

鎔其先回鶻部人父景崇世襲鎮州節度使鎔年十歲襲
父位昭宗朝賜號敦睦保定久大功臣位至成德軍節度

使守太師中書令封趙王梁祖稱帝奉梁正朔同光中復
臣附後唐後爲親軍所殺

薦王師範表

臣聞推亡固存古有明義興滅繼絕書著前文蓋聖王宏
延賞之恩哲后開勸能之道故吳君錄舊育凌統之孤兒
漢帝追功舉張良之愛子臣伏見故淄青節度使檢校司
空同中書門下平章事王敬武將星發彩金匱傳符推心
皆務於政經戮力每勤於王室自艱難變運鑾輅省方海
嶽一隅不驚刁斗關畿數路嘗走梯航加以淪落衣冠流

亡民庶皆能賑卹盡致昭蘇可謂輔國蓋臣佐時良牧而
不幸秋蘭敗葉朝露晞光俄成就木之悲不盡登壇之寄
其男檢校工部尚書權知畱後事師範親爲嫡長才實瓌
奇早綰父兵夙知軍志張飛之敵每說無前魏萬之名咸
言必大頃以元戎物故外府事殷體人情懷騷動之虞俟
朝奏有關河之隔以是連營義旅比屋烝黎追樂社以增
哀思召棠而漚懇爰從苦塊抑主兵戎分少拊寒盡同赤
子望雲就日頗罄丹誠今則戈戟罷尋光陰已變險夷一
致首尾二年雄稜真是其將門造次不渝於臣節雖皇華

紫詰慰安相繼於道途而舊旆油幢承寵未聞其擬議將
何以寬諸衆望塞彼羣情光成季之高勲表臧孫之後嗣
伏望皇帝陛下信敷九有仁覆萬方當惟新革故之時思
就俗理人之道克全修偃早委節旄俾其戶戶披雲皆瞻
白日人人棄管盡覩青天覃四時不宰之功救五郡倒懸
之苦則豈獨自夷及夏咸知煦嫗之恩誠亦在存與亡俱
荷生成之施

薦幽州權兵馬畱後李全忠表

臣准幽州狀報當道以李全忠權知節度兵馬畱後事伏

以天步初迴神京乍復凡諸藩鎮咸務謐寧況幽州地控
北番界臨東海土俗素稱其雄勇人情須自於綏懷畱後
李全忠夙習武經頗彰公器軍郡旣聞其愛戴轅營必議
於叶和苟將付以元戎誠謂雅符衆望臣累令偵探靡不
端詳事繫安危理難緘默伏惟皇帝陛下早迴天鑒速注
陽光便委兵權俯徇人欲則豈獨遐陬士卒便獲其慰安
實亦隣壤生靈免虞其騷動關於久遠合具奏陳

復魏博節度使樂彥禎書

近承新使復覩羽書側聆計國之規實激懦夫之志竊自

運貽百六禍遍寰區羣盜薦興生靈無庇朝章國典誰爲
稟命之人黷武窮兵孰是勤王之旅咸以乘虛窺伺觀釁
憑陵以掠奪爲功以殺傷爲務皇威所不能制天道所未
能誅或徑越大河或竊居方鎮縱狼貪而未已畜虺性以
難馴內雖以効順爲名外皆以亂常無懼遂跨州連郡十
室九空良繇諸侯各固一方不思同力自致喪牛之悔久
虧刑馬之盟近則布露腹心冀完虞號今明公諭之以長
策示之以壯圖結五鎮以齊明俾一家而不異竊惟高義
實邁前修顧魯衛以同歡誠敦夙契在江黃而列會願接

下風況當道處河朔之中最爲脣齒據親舊之分寧異金
蘭固當禺俟捧盤無渝匪石然以事關久遠議非一方必
決定否臧審其同異待隣藩符會則決別相從

楊洽

洽王鎔辟佐幕

鐵火筋賦

以堅剛挺質用
舍因時爲韻

物亦有人莫能捐惟茲鐵筋旣直且堅挺剛姿以執熱
揮勁質以凌煙安國罷悲於灰死莊生坐得於火傳交莖
璀璨並影聯翩動而必隨殊叔出而季處持則偕至豈彼

後而我先有協不孤之德無媿同心之賢至如元冬方沍
寒夜未央獸炭初熱朱火未光必資之以夾輔終俟我而
擊揚焚如燄發赫爾威張解嚴凝於寒室播溫暖於高堂
奪功縣續挫氣雪霜夫如是則筋之爲用也至矣如何不
臧銳其末而去其利端其本而秉其剛信執箠之莫儔何
支策之足重專權有茲故我獨任而無成雙美可嘉故我
兩莖以爲用抱素冰潔含光雪新同舟楫之共濟並輔車
之相因差池其道勁挺其質止則疊雙用無廢一雖炎赫
之難持終歲寒之可必嗟象筋之宜舍始階亂而傾社鄙

囊錐之孤挺卒矜名於露穎伊瑣瑣之自恃獨錚錚而在
茲佐紅爐而罔忒煩素手而何辭因依獲所用舍隨時儻
提握之不棄甘銷鑠以爲期

孔邈

邈文宣王四十一代孫乾寧五年舉進士除校書郎崔遠
在中書奏爲萬年尉充集賢校理遷諫議大夫後唐同光
中以年老致仕

請許注擬天成元年已有出身人奏

近見選人或以志在循陔難違色養或以家同懸罄不辨

裂裳致違調選之期遂遇廢沉之例臣愚伏請自天成元年已前有出身分明者悉許注擬況三蜀之內員闕極多俾出自於朝恩免使希於假攝

請錄死事子孫疏

臣聞賞延於世實皇王體國之規立身揚名爲人子承家之道苟推誠於忠孝必懷慶於子孫存歿共瞻君親是望伏自陛下中興大業念舊錄勲賞賜無時渥恩咸徧尚慮有奮身爲國跡殞魂孤姓名不達於乾坤骨肉飢寒於道路不因詔書博訪所在不與申聞伏乞特下外藩如有身

歿王事忠節顯彰軍伍備聞恩澤未及者必令具錄聞奏
如有子孫便委所司齒錄使父母有可依之地妻孥免無
告之心如祇有孤遺亦便令救卹卽已往者知皇恩不棄
將來者罄臣節何疑楚師忘寒空憑念問周文葬骨唯示
深仁冀於有道之朝不漏無垠之澤

薛昭文

昭文後唐同光二年官諫議大夫

陳十事疏

臣聞夏德方衰未顯中興之運漢儀重覩果成反正之功

稽其上代帝王前朝基業未有不中罹屯否間有凶災是
資明聖之謨更廓靈長之祚伏惟昭文睿武至德光孝皇
帝陛下繼漢大寶繼禹鴻名興牧野之師功如破竹拔朝
歌之壘疾若建瓴俄平國家之讎大刷神祇之憤皇威遠
振睿德遐敷自陛下應天順人奄有諸夏九州欣戴萬國
樂推旣混一於車書方大定於區宇藩服靡不入貢夷狄
靡不來庭銳旅雄師無敵於當代謀臣勇將有備於中原
然而尚有凶悖之徒竊據於屏翰愚迷之輩憑恃於江山
雖聞向化歸朝猶敢改元僭號在陛下武功天縱百越不

得不臣在陛下文德日新三苗不慮不格夫人乃邦之本
兵者國之器要在安其人而固其本訓其兵而利其器國
富兵强家給人足臣有管窺十條謹錄奏聞伏乞俯迴聖
覽其一曰陛下復居聖唐之運祚雪先帝之讎仇戎狄尚
解懷柔藩服豈敢拒命而數處僭僞之地尚未悛心料此
凶狂必自覆滅臣請陛下明宣睿算大振天威秣馬耀兵
亦不指名何處且爲討逆伐叛之計而狡妄之輩饕餮之
徒聞我大國萬旅雲屯六軍雷動如此昏迷之黨不俟赫
斯之怒經畧之謀彼必斂衽而朝望風而潰自願納款歸

國矣斯必有征無戰之道也其二曰臣伏見隨駕兵士久經戰戈咸著勤勞皆忠勇以難儔尚貧乏而未濟雖陛下告成郊丘之後大行賞給之恩然而或未優豐尚多覬望非不知國力尚闕天府未充臣又聞自古王皇建基業撫軍戎未有不損玉帛輕財寶以餌於戰陣之士是故先代撥亂之軍以此皆畱意也今以諸道上供錢物進納不時遂致朝廷薄於犒散稍爲經度以濟急需近者藩臣供奉慶賀財帛及南郊或有經費羨餘物色等伏請且據帑藏更加頒賚先隨駕兵師宴犒代潞州將健也其三曰臣竊

見河南兵不少亦是先在僞廷備經訓練頗聞精銳皆堪
征伐自陛下平定汴州已來尋曾選揀或聞諸道分臂之
時未甚精細或有勇悍者放歸田里或有懦弱者畱在軍
都當差發征行則逃避諸處以此散失其數實繁請宣示
租庸司先管兵帳所司子細磨勘向來所係數額多少兼
取近年諸道所申逃背名帳較量比舊額少剩卽知元數
減耗臣聞夫軍伍者以豐財爲務以重賞爲先其河南道
先管兵士伏慮三數處僭號不臣之地以厚利誘之歲月
滋深耗蠹必甚請陛下詔勅令在京及諸道常加點捉安

撫兼勤給其衣糧務令得所仍乞嚴勅邊界要害津鎮寅
夜鈴轄無令透漏兼先有放歸農畝者亦諸指揮州縣鎮
浦點檢姓名嘗知所在或緩急追呼稍有前卻者請罪本
處軍吏節級等庶耕耨不隳征伐有備倘陛下納臣所奏
則不臣之人知國家訓戒講武維甲治兵彼之克徒必懷
懾懼則旦夕相率有臣事本朝之計脫使賞給不充撫養
不至非惟士卒生刼掠之心抑以步伍有逃遁之患必慮
夫多投逆臣之境更資悖慢之性也其四曰臣竊見諸道
百姓皆陛下赤子爰自比年以僞廷徭役頻仍租賦繁重

餽挽不已疲敝益深既不聊生率多逋竄雖有德音軫恤未聞時降招攜亦請宣取租庸司應河南先在僞廷戶口文帳磨勘從前多少數目兼勘諸道所申近年見管及流亡戶口卽知人數增減此則慮僭僞之處多方招誘伏乞特降優詔委所在觀察使刺史官吏已下設法撫綏事件無損於官有益於人者仰二縣條貫申奏仍請下中書量其利便並許施行本分稅租稍令假借諸雜科徭特予減等以表撫俗安民興邦固本之道也其五曰本朝至德年祿山之後復京雒之初兵革之餘生聚彫瘵屢降恩詔撫

恤生靈仍遣使臣詔問閭里今陛下嗣守鴻業光啓雄圖
故事前規可得敬而行之伏請每年准舊事出郎官御史
忠良廉潔明幹堪充使者令散往諸道採訪賢良撫問疾
苦務安兆庶以拯弊氓也其六曰竊以僞廷僭號俄逾一
紀連年征剝繁日科徭士不聊生人不堪命生聚塗炭戶
口流亡河南之民皆企踵側身日望陛下復我唐之鴻基
慰兆民之疾痛今陛下弔民伐罪新有中原所宜減省斧
斤未欲增修宮室昔漢文帝將起露臺計百金之費且曰
百金中人十室之產吾有先人宮室何事臺爲遂罷天下

聞之萬古稱漢文之儉德也臣竊以陛下以慈愛爲心以孝理爲念聖德日新又何讓於漢文矣伏惟陛下慕唐堯土階之事善夏禹卑宮之規停土木之工止營構之役斯則區夏欣悅億兆歌謠自然平揖唐堯漢文之至化也其七曰臣聞漢祖初入咸陽令蕭何收秦之圖籍及高祖神堯皇帝平定關中亦允收隋室羣書仍聞歲降賜天下搜訪其後盈溢於石渠東觀充滿於祕閣蘭臺以是兩漢之詩書之盛與三代同風也自貞觀開元之後文物煥然何止同風可謂超冠於三代也今陛下嗣周景祚紹禹靈圖

睿藻日新聖文天授崇文允武咸五登三將恢偃戢之規
在廣訪搜之道伏請降使采訪天下圖書以示武王偃武
虞舜舞干致太平之永遠也其八曰臣聞惟王建國辨方
正位況河雒之名都帝王之二宅爲萬國輻湊之地乃四
方表則之邦若不廣闢康莊何以壯觀輦轂自喪亂以來
兵火之後九衢荒廢但長荆榛廣陌蕭條惟滋蔓草今陛
下富有四海作宅神都當六龍游豫之時是萬方朝聘之
日雒陽大道所宜法於前規鼎邑長衢豈可隳於舊制其
都城六街請下河南府及左右金吾仰仍舊依古制分擘

爲吳越國王於戲地奄數圻賦過千乘墨守闔閭之境範圍勾踐之封子弟量才敘進多分於榮戟土疆漸海方輸豈限於魚鹽貴盛富強雖古之封建諸侯禮優夾輔不加於此愼厥終始無以位期驕無以欲敗度欽承賜履協於一人汝嘉可檢校太師守中書令

欽定全唐文卷八百四十四目錄

許維岳

科舉額數請依長慶咸通事例狀

郭崇韜

上陳情表

第二表

第三表

條陳三銓事例奏

請獎獻書人奏

對割鄆州和梁疏

郭廷誨

對祭闕頒誥判

對復以冕服判

康延孝

對莊宗疏

竇夢徵

祭故君文

蕭頊

議覆中書請祧懿祖奏

覆准馬縞議奏

王正言

請停北京宗廟議

豆盧革

田園帖

任圜

請慶賀例貢馬價更以所在土產奏

欽定全唐文卷八百四十四

許維岳

維岳後唐同光時人

科舉額數請依長慶咸通事例狀

伏見新定格文三禮三傳每科只放兩人方今三傳一科五十餘人三禮三十餘人三史學究一十人若每年止放兩人及一人逐年又添初舉縱謀修進皆恐滯畱臣伏見長慶咸通年放舉人元無定式又同光元年春榜亦是一十三人請依此例以勸進修

郭崇韜

崇韜字安時代州鴈門人天祐中累擢中門副使加檢校太保守兵部尚書充樞密使梁亡以佐命功代豆盧革行中書事拜侍中領鎮冀州節度使進封趙郡公賜鐵券恕十死莊宗討蜀爲招討使蜀平之後莊宗因讒密詔繼岌槓殺之

上陳情表

臣聞底力辭封者貞臣之至節慢官速戾者有國之常刑其或任重材輕智小謀大縱君恩念舊

闕一字

貽覆餗之譏

儻官業無章何顯陟明之道臣本轅

闕

小校樗朽凡姿在

公雖歷於年深臨事莫聞於日益頃者皇帝陛下雄圖方
運陽德初潛爰將整於規繩乃俾司於機務此際臣亦內
循短淺累具退陳而陛下天睠不迴國權堅付在一時而
難違重命許五年而別選通人邇來雖昧經綸強施勤拙
至於戡夷巨孽續紹鴻基雪三百年社稷深冤立十九葉
宗祊大事皆謀從聖慮斷在宸衷兼列較之同心非微臣
之獨計況今名昇台輔任處樞衡珥貂冕於朝端統龍旌
於閭外恩榮有進功德無稱終憂卽鹿之嫌寧抑懸貺之

刺今則陛下功全報本禮極配天衣冠盡列於朝廷名器
自推於碩德況臣才謨素寡齒髮漸衰以有限之精神當
無窮之事務必須下傾肝血上告天聰冀勞逸之稍均庶
初終之可保伏望陛下念臣不迨察臣繇衷其樞密使比
列親班實爲要執卽復本朝規制宜選內官掌臨一則使
權職有分一則免心力俱耗輒滋傾瀝非敢闇欺干犯冕
旒伏增隕越

第二表

臣以機務實繁智力俱困輒有聞天之請願辭密地之權

豈謂聖旨俄宣皇情未允捧對而水湯滿腹揣修而芒刺盈軀臣以委質無材受恩踰等強展神扶之力每懷曠敗之憂自陛下委寄重難纏綿歲序臨事而退思補過竭力而知無不爲陛下沿河料敵之時對寨交鋒之日臣若顧將丹素堅有讓陳不唯招避事之機抑亦顯不忠之罪況今元克己殄不構彌隆圓丘陳報本之儀寰海被無私之化英髦星萃俊邁雲臻緬惟不迫之才豈掩旁求之命矧乃一身多疾三處持權捫心益懼於滿盈持懷每虞於忝據伏望陛下特迴睿照迺悉煩襟終乞輟此要樞歸於內

列一則表大國有進賢之道二則免微臣有竊位之名干冒宸嚴無任迫切

第三表

臣伏念朝廷起軍之際陛下決於宸斷撫臣背曰此去必盪寇讎可期清泰事了之後與卿一鎮臣仰奉成算固絕他疑果賴神謀尋平僞孽今乾坤交泰弓矢載櫜徽章以正於母儀嘉禮獲申於元子須傾血懇仰瀆宸嚴但以密近之權合歸重望鈞衡之柄宜屬通材至於所領節旌雖是陛下所許伏緣鎮州在北狂虜未除慮有奔衝須爲控

扼亦希付於上將所貴殿彼一隅伏望陛下道極照臨仁
深覆載念臣久司繁重憫臣方在衰羸退放居閒俾從導
養臣無任祈天憑懇之至

條陳三銓事例奏

臣伏見今年三銓選人并行事官等內有冒名入仕假蔭
發身或卜祝之徒工商之類既溜澠之一亂諒玉石之寧
分蓋以僞朝已來蠹政斯久猾吏承寬而得計非才行貨
以自媒上下相蒙薰猶同器遂使寒素者多遭排斥廉介
者翻至湮沉不唯顯紊於官箴抑亦頗傷於治本近以注

擬之後送省之間引驗而已有異同僭濫而果招論訟將
數至化須塞倖門臣欲請別降條流特行釐革許其潛相
覺察互有告陳若真僞之能分卽賞刑之必舉應見注授
官員等內有自無出身入仕買覓鬼名告勅及將骨肉文
書指改名姓或歷任不足妄稱失墜押彼公憑或假人蔭
緒托形勢論屬安排參選所司隨例注官者如有人陳論
勘鞫不虛者元論事人特議超獎如未合格人或無名駁
放者便承僞濫人所授官資其所犯人下所司簡格處分
如同保人知保內有冒名濫進之謀亦許陳首若遞相蓋

藏被別人論告並當駁放其銓司闕頭人吏如被形勢迫脅主張踰濫選人及自己不公亦許陳首並與放罪若被人論告當行朝典兼恐見任官及諸道選人身死多有不肖子孫將出身歷任告勅貨賣與人自今後仰所在身死之處並須申報本州令錄事參軍於告勅上分明書身死月日卻分付子孫兼每年南曹及三銓停滯多及周歲致選人廣作京債經費倍多致其到官必不廉慎此後至春來並須公事了絕若更逗畱當加責罰所有懼罪逃移者仰所司具錄名姓申奏請終身勿齒兼牒本貫州縣各令

知悉或有條流未盡處仰所司簡長定格別具條奏

請獎獻書人奏

伏以館司四庫藏書舊日數目至多自廣明年後流散他方宜示獎酬俾申搜訪伏乞委中書門下再行勅命遍下逐道或有人家藏能以經史百家之書進獻數及四百卷已上者請委館司點勘無脫漏於卷軸無重疊於篇題比外寫剞精詳裝飾周備當據部帙聞奏請量等級除官仍仰長吏明懸榜示卽鄉校庠塾之業漸闡皇風金石絲竹之音無虞墜典

對割鄆州和梁疏

陛下不櫛沐不解甲十五餘年欲雪國家讎恥今已正尊
號始得鄆州尺寸之地不能守而棄之臣恐將士解體將
來食盡衆散雖畫河爲境誰爲陛下守之臣嘗細詢康延
孝以河南之事度已料彼日夜思之成敗之機決在今歲
梁今悉以精兵授段凝決河自固恃此不復爲備凝非將
材不足畏降者皆言大梁無兵陛下若畱兵守魏固保楊
劉自以精兵與鄆州合勢長驅入汴僞主授首則諸將自
降矣不然今秋不登軍糧將盡大功何由可成諺曰當道

築室三年不成帝王應運必有天命在陛下勿疑耳

郭廷誨

廷誨崇韜子崇韜被誅廷誨隨父死於蜀

對祭闕頒誥判

所司有禮事不頒誥所由斷徒訴不伏

於糾禮官無辱祀典欽若天地肅恭神人如何有司失其
頒誥將季氏之待暗失由也之質明致使燹燎不供難爲
魯祭燿火無設便乖漢典宗伯或差於三望太常乍闕於
六宗職此之由而褻其守天秩有禮罔不克集寘以徒坐

復何疑焉

對復以冕服判

甲復以冕服御史糾其違失

生也有涯死而必復苟或不率克有常憲故國備典訓禮
陳等威虞人以具階崇壯士以奉職顯若禱其五祀則事
始東榮或問以三號而復行左轂自適變通之要夫何過
差之有惟甲何者以冕而復同鄩人之失德刺起素冠齊
魯俗之虧喪僭彰元毳既非五等之列須異九儀之品何
乃不類祇自塵兮非大猷是經而峻簡斯糾違失之禮其

難捨諸

康延孝

延孝塞北部落人梁開平乾化中自隊長積勞至部校後唐同光中爲捧日軍使兼南面招討指揮使檢校司空守博州刺史莊宗平汴以功授檢校太保鄭州防禦使賜姓名紹琛二年遷保義軍節度使三年討蜀以爲西南行營馬步軍先鋒排陣斬斫等使蜀平以西平王朱友謙伏誅遂謀叛自稱西川節度三州制置等使都將何建崇擒斬之

對莊宗疏

梁朝地不爲狹兵不爲少然主旣暗懦趙張擅權內結宮掖外納貨賂段凝智勇俱無專率斂行伍以奉權貴梁主不能專任將帥嘗以近臣監之進止可否動爲所制近又聞欲數道出兵令董璋趨太原霍彥威寇鎮定王彥章攻鄆州段凝當陛下決以十月大舉臣竊觀梁兵聚則不少分則不多願陛下養威蓄力以待其分帥精騎五千自鄆州直抵大梁擒其僞主旬月之間天下定矣

竇夢徵

夢徵同州人舉進士仕梁歷校書郎自拾遺召入翰林充
學士以論錢鏐謫掾東州復召爲學士後唐莊宗入汴貶
沂州量移宿州天成初遷中書舍人復入爲翰林學士工
部侍郎卒贈禮部尚書

祭故君文

嗚呼四海九州天迴睽命一女二夫人之不幸當革故以
鼎新若金銷而火盛必然之理夫何足競

蕭頊

頊字子澄京兆萬年人昭宗朝舉進士累遷吏部員外郎

入梁厯給諫御史中丞禮部侍郎尋以吏部侍郎拜中書門下平章事後唐莊宗入立貶登州司戶量移濮州司馬遷太子賓客天成初以禮部尚書太常卿太子少保致仕卒年六十九贈太子少師

議覆中書請桃懿祖奏

厯代故事沿革不同蓋就所宜期於合禮事雖稽古理亦從長七廟之致享斯存萬世之承基靡絕禮分遠近事究否臧懿祖既遠於昭宗創業又非於己力儔諸列聖可議桃遷皇帝陛下道繼百王德符三代撥禍亂於艱難之際

數蒼生於交喪之秋方啓洪圖是崇宗祏爲四方之准的
稱萬國之照臨中書所定祧遷於議爲允請下所司施行

覆准馬縞議奏

伏見方冊所載聖概斯存將達蘋藻之誠宜新粢稅之制
伏惟陛下以孝敬日躋之德上合穹旻秉恭儉罔怠之規
再康寰宇爰臻至化難抑時思馬縞儒學優深禮法明練
所奏果符於睿旨載詳固叶於典經臣等集議其追尊位
號及建廟都邑則乞發自宸衷特降制命

王正言

正言鄆州人賀德倫鎮青州表爲推官改觀察判官後唐同光中累擢戶部尚書興唐尹尋遷租庸使守禮部尚書明宗卽位求爲平盧軍行軍司馬卒於任

請停北京宗廟議

伏以宮室之制宗廟爲先陛下卜雒居尊開基御宇龍樓鳳輦式當表正之初玉葉金枝悉在股肱之列事當師古神必依人北京先置之宗廟不宜並設竊以每年朝享固有常儀時日旣同神何所據常聞近例禮有從權如神主已修迎之藏於夾室若廟宇已崇虛之乃爲常制昔齊桓

公之廟二主禮無明文古者師行亦無遷於廟主昔天后之崇輦雖悉謂非宜漢皇之戀豐滕事無所法而況本廟故事禮院具明且雒邑舊都嵩邱正位當定鼎測圭之地乃居衝處要之方今則皇命承天握圖纂祀九州是務四海爲家豈宜遠宮闕之居建祖宗之廟事虧可久理屈從長北京宗廟請停

豆盧革

革同州人唐末避地中山唐亡爲王處直掌書記轉節度判官後唐莊宗卽位以宰相盧質薦徵拜行臺左丞相同

光初拜平章事天成初諫官誣以縱田客殺人貶辰州刺史再貶陵州長流百姓二年詔逐處刺史監賜自盡

田園帖

大德欲要一居處畿甸間舊無田園鄜州雖有三兩處莊子緣百姓租佃多年累有令公大王書請卻給還人戶蓋不欲侵奪疲民兼慮無知之輩妄有影庇包役

任園

園京兆三原人唐末依李克用歷代憲二郡刺史莊宗承制改潞州觀察判官累遷工部尚書兼真定尹北京副畱

守明年郭崇韜兼鎮改行軍司馬充北面水陸轉運使同
光三年入爲工部尚書天成初拜平章事二年除太子少
保致仕出居磁州爲安重誨所害清泰中制贈太傅

請慶賀例貢馬價更以所在土產奏

伏見蕃牧臣僚每正至慶賀例皆進馬臣以捧日之心貴
申其忠孝追風之步必擇於馴良備乘奉於帝車資駟駿
於天廐伏見本朝舊事雖以進馬爲名例多貢奉馬價蓋
道途之役護養稍難因此羣方久爲定制自今後伏請只
許四夷番國進駟馬其諸道藩府州鎮請依天復三年已

前許貢綾絹金銀隨土產折進馬之值所貴稍便貢輸不
虧誠敬兼請約舊制選孳生馬分置監牧俾飲齕而自遂
卽駉牝之逾繁者